

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"Ei te ture, ei te parau, ta ratou e imi; ia ore ia faaaui i ta ratou parau i taua parau ra, no te pouri ia i na reira'i ratou ra." Isaia: 8: 20.

Nu. 3.

Mati, 1913.

Mat. 6.

Teiheia Ra te Parau Mau.

[Ua faaauihia teie nei parau, mai te mea ra e, e paraparauraa ia. Tei roto atoa teie nei parau i te re'o Farani, e te re'o Beritane atoa hoi, e e haponohia'tu ai i te mau taata o te ani mai.—FAAAUIHIA E FARANI FULUMARE.]

TEI te hoê oire iti i Amerika te tupuraa o teie nei parau.

Tei reira hoi te hoê fare tipaeraa ra, e e rave rahi rii te taata tei parahi i taua fare ra. O Maratala te fatu o taua fare tipaeraa, e e vahine ta'na, e e tamahine paari ta raua.

Tei rotopu i te mau manihini o te fare ra te hoê avota, e te hoê taote, e te hoê orometua Porosetani. O Barone te i'oa o te avota ra, e ua parahi tamau oia i taua oire iti mai te rave i te ohipa o to'na toroa. O Ioane te i'oa o te taote, e e taata apî oia, e ua apî hoi ta'na mauraa i taua toroa ra, e ua imioia i te vahi maitai e rave i to'na ohipa taote. O Viliamu te i'oa o te orometua, e taata paari oia e te haapiihia. Ua faaea oia i to'na ohipa orometua i na avae e ua mataitai haere oia i te fenua, ia roaa faahou te itoitoe i to'na tino.

I te ahiahi o te hoê mahana, ia oti a'era te tamaraa, putuputu ihora te tahi pae rahi o te mau manihini i nia i te taupee i te pae puai vai o te fare ra, e ua paraparau ratou

ratou iho i te mau parau e rau te huru. — Tei rotopu atoa ia ratou te hoê manihini apî, o tei tae mai i taua mahana ihora. No te tooa o te râ mai oia, o Tihare to'na i'oa, e ua tae oia i te toru ahuru tiahapa o te matahiti. E taata ite maitai oia i te paraparau, aita râ oia i faaahaaha ia'na iho, e no reira ua farii-maitai-hia oia i ô ratou ra.

E oti a'era ta ratou uiuiraa i teie nei taata apî i te huru o to'na haereraa mai, e te parau apî i te fenua no reira mai oia ra, ua na ô atura te orometua Viliamu ia ratou: "Te oaoa nei au i te mea e, ua farii to te mau fenua papaa i te Mesia, e Kerisetiano hoi te pae rahi."

"Te faatia nei au i te tahi pae o ta oe nei parau," te na reira atura Barone, "e ere râ vau e melo i te hoê haapaoraa Kerisetiano, e aita hoi au i mana'o e, e faufaahia te taata i te reira."

Ua na ô maira Viliamu, "Oia? Te mana'o ra vau e, e haapaoraa ekalesia to te mau taata atoa o te mau fenua papaa."

"Eiaha vau," parau atura Barone. "E teie te mea maere, ua noaa ia'u teie huru mana'o na roto ite faarooraa i te mau tatararaa huru e a te mau haapii evanelia. E te mana'o nei hoi au e, te haapii nei, e te a'o atura hoi ratou i te mau parau e rave rahi i haapao-ore-noa-hia e ratou iho. E te ohipa rahi hoi o te mau orometua o te imiraa moni ia."

Te faaroo maite noa ra te manihini apî, o Tihare, i taua paraparauraa nei, mai te mea ra e, ua faatiahia to'ua hinaaro mau, e aita roa oia i haamâ ia pahono atu i te mau uiraa ta te mau taata i ui mai ia'na i te huru o to'na mana'o.

Te parau maira Viliamu e, ua opua oia ia tamata i te faafariu i taua taata faaroo ore ra, ia Barone, e ua na ô maira oia ia Tihare: "Aita hoi au i ite e, no ô nei oe ia'u nei e no ô mai ia, no te mea ua tae mai nei oe no ô mai i te fenua o te taata tiamâ ra, no reira, te mana'o nei au e, e tauturu mai paha oe ia Barone."

"E hoa," te na reira atura Tihare, "ua mauruuru vau i

teie nei parau ta tatou i fatata i te feruri. E mai te mea e, e au ia outou atoa na, e tamata ia vau i te faaite atu i to'u nei mau mana'o. E taata faaroo hoi au i te Evanelia a te Mesia, e ua roaa ia'u te ite i te reira no ô mai i te Atua ra, area râ ua patoi-pinepine-hia vau e te mau orometua evanelia."

"Aita vau i ite i te tumu i na reira'i ratou," parau maira Viliamu, "ia faaroo ra oe i te Mesia."

Parau atura Tihare: "Ia faatia oe ia'u ia faaite atoa'tu i to'u mana'o i ta orua o Barone paraparauraa, e mauruuru roa vau i te reira; tirara, ia huru ê to tatou mana'o i nia i te hoê vahi, eiaha tatou e inoino te tahi i te tahi."

"Na reira hoi," te na reira maira Viliamu, e ua faatia te mau taata i taua faaauraa ra, "e teie nei e Barone, eaha te tahi vahi i te haapaoraa Kerisetiano aore i tia ia oe ia faatia?"

"E hoa, e rave rahi to te reira; teie râ e haamata tatou i te tahi parau tumu o to oe faaroo. Tera te huru o te hoê haapiiraa Porosetani: 'Te vai nei te hoê noa iho Atua mau, e Atua ora e te mure ore; aita a'na e tino e te melo e te hiaai; e Atua mana hope oia, e ua hope to'na paari, e to'na maitai; tei hamani e tei faaora i te mau mea atoa i itehia nei, e te mau mea hoi i ite-ore-hia nei; e tei roto i te taotahiraa o te Atuaraa e na mea tootoru i te tino hoê, i te mana hoê, e i te vairaa mure ore hoê—te Metua, te Tamaiti, e te Varua Maitai.' Mai te au i teie hiroa faaroo, te faaroo nei oe e, o te Metua, e te Tamaiti, e te Varua Maitai, o te hoê ia mea (taata), ma te tino ore, e te melo ore, e te hiaai ore."

"Ua tano ta oe taioraa," parau maira Viliamu, "e eaha te vahi aore i tia ia oe ia farii?"

"Aita i tia ia'u ia haroaroa i te hoê Atua, aore a'na e tino, e te melo, e te hiaai. E aita hoi au i ite i te hoê parau i roto i te Bibilia tei faatia i tena mana'o."

"A! Barone," ua parau maira Viliamu, "e haapao tatou i ta Isaia ra, 'Ei te ture, ei te parau ta ratou e imi',

Isaia 8: 20, e e haapapu oioi au ia oe na e, e faatia te Bibilia i te parau mau o te parau e, te Metua, e te Tamaiti, hoê â ia. Oia ia, parau atura Iesu iho e, 'O vau e te Metua ra, hoê â ia'. Ioane 10: 30. E ere anei te reira te parau mau?"

Ua parau atura Tihare e: "E ere anei teie to'na mana'o e, oia e to'na Metua, hoê â ia i te raveraa i te ohipa, e e au raua raua iho i te mau mea atoa? Mai tera te huru, te mana'o e te hinaaro o te Atua, o te mana'o e te hinaaro atoa ia o te Tamaiti."

"E ere ia," parau maira Viliamu, "ua mana'o to tatou Fatu i te parau ta'na i parau atu, ia parau oia e, 'O vau e te Metua ra, hoê â ia.'"

"E mana'o huru ê roa to'u," parau atura Tihare, "no te mea ua ani Iesu i to'na Metua ia faariro i ta'na mau pîpî ei hoê, mai ia'na e to'na Metua i te huru, mai tei faaitelia i Ioane 17: 20-21. E teie nei, mai te au i ta oe parau, ua hinaaro te Mesia ia moe i ta'na mau pîpî to ratou iho mau natura, to ratou iho mau tino, te tino tahuti e te tino tahuti ore."

"E Tihare e," parau atura Barone, "ua tia roa to oe mana'o."

"A faaroo mai na outou," te na reira maira Viliamu, "Aita anei o Iesu i parau atu e, o tei hi'o mai ia'u ra, ua hi'o ia i te Metua?" Ioane 14: 9.

Parau atura Tihare e: "E, e no te aha râ? No te mea, ua parau atura Paulo e, 'o te anaana hoi oia o to'na ra (o to'na Metua ra) hanahana, e o te hoho'a mau ia no'na iho.' E no reira ua tano mau ta Iesu parau i ta'na mau pîpî, o tei na ô maira e, 'o te hi'o ia'u ra, ua hi'o ia i te Metua.' Ia ite ta'na mau pîpî i te hoê, ite atoa ia ratou i te tahi, na roto i te hoho'a mau o te tahi i te tahi. Ia haere Iesu i te hoê vahi, o Getesemane te i'oa, ia pure, ua na ô atura oia: 'E tau Metua e, ia tia ra, e hopoi ê atu i teie au'a, ia tupu râ to oe hinaaro.' Mataio 26: 39. E teie nei, ua pure oia ia vai i reira? Te ani ra anei oia i te hoê haamaitairaa

ia'na iho."

Ua parau maira Viliamu, "Aita, aita roa'tu. Te pure ra oia i te Varua Maitai i reira."

"Parau atura Tihare e, "Na roto i tera parau na oe na, ua faataa oe i te hoê o te tootoru no Iesu; i te matamua ra i parau mai oe e, e taata hoê taua na tootoru ra, e teie nei ua noaa ia tatou te faataaraa i te hoê no roto mai i te tootoru; e tamata tatou i te faataa i na toopiti i toe. No reira e haapapu vau ia outou no te poheraa o Setephano. Ia fatata oia i te pohe, hi'o atura oia i te ra'i, e ite ibora i te hana-hana o te Atua; te tia ra te Mesia i te rima atau no te Atua. Ohipa 7: 55. E tia anei i te hoê taata ia tia i nia i to'na iho rima atau? Aita roa ia. E hi'opoa atoa hoi tatou i te parau no te baptizo-raa-hia o te Mesia, ei te tahi parau faatia, tei faaite ia tatou e, e taata ê te Mesia i te Metua. Ia haere maira Iesu i nia, mai raro mai i te pape, eaha tera mea ta'na i hi'o, tei pou mai na roto i te hoho'a o te uupa ra?"

"O te Varua Maitai ia."

"Parau mau te reira, e no vai te re'o no te ra'i mai, i te na ôraa mai e, 'Ta'u Tamaiti here teie, ua mauruuru roa vau ia'na.' Mataio 3: 17. A haamana'o oe e, te tia ra te Mesia, tei faateiteihia i nia mai raro mai i te pape, te hoê taata; te Varua Maitai, tei pou maira mai te ra'i mai, na roto i te hoho'a o te uupa, te piti o te taata; e ere anei te reira re'o no te ra'i mai, o te re'o o te toru o te taata? E teie nei, e faaite atu au ia oe i te tahi—"

Tupu atura te riri i roto i te aau o te orometua i reira, e ua parau maira oia e, "Aita i tia ia tatou ia haroaroa i teie nei mau mea, e au mau here e, e te a'o atu nei au ia outou ia vaiiho i tera mau mana'o maamaa, no te mea —"

"Eiaha e rû; eiaha e rû," te na reira atura Tihare, "te parau nei anei oe e, 'e mau mana'o maamaa?' E hoa e, ua na ô atura te hoê taioraa, 'Teie hoi te ora mure ore, ia ite ratou ia oe i te Atua mau ra, e ia Iesu i te Mesia, i ta oe i

tono mai.' Ioane 17: 3. E no reira, ia haapii tatou e tia'i i te huru mau o te Atua. Te parau nei oe, e Viliamu e, e mau mea maamaa teie, area râ, te parau noa ra te Bililia e, ia haroaroa tatou e tia'i i teie nei mau mea, mai te mea e hinaaro tatou i te ora mure ore. Ua na ô atoa te Bibilia e, 'O vai hoi te ite i te mau mea a te taata maori râ o te Varua taata i roto ia'na ra? oia atoa te mau mea a te Atua, aore roa te hoê i ite, maori râ o te Varua o te Atua.' Korinetia I, 2: 11. E hoa e, te parau ra oe e, e tavini oe na te Atua, e no reira e mea au maitai ia oe ia titau i te maramarama, ia tia ia oe ia haroaroa i te Atua mau e i te Mesia atoa ta'na i tono mai."

(E tuatihia mai teie parau.)

Te Mana'oraa i Galilea.

1.

Te tia noa o Iesu e,
I te hiti ra o te roto;
Na pîpî ta'na i riro mai;
E feia iti; na ravaai.

OAORAA:

E Galilea, E Galilea,
Te roto herehia e;
E Galilea, E Galilea,
Ia oe matou e arue.

2.

Te haereraa o Iesu e,
Na nia i te mau are;
Ora'tura ia Kepha e,
I te roto, i Galilea.

3.

A faaea na! A mania!
Ta'na ia parau, ei faaueraa,
A tere ai ra na te roto,
I Galilea, roto hau ê.

Te Parau Tuatapapa no
Iosepha Semita.

(TUATIRAA.)

PENE XXX.

MATAHITI 1838-39.

Ua anihia te hui taata faatere no te hau Missouri ia tauturu mai i te Feia Mo'a. Faatoroahia ihora o Ioane Tela raua o Ioane E. Page ei na Aposetolo. Te faaineineraa i te faarue ê atu i Missouri. Te haamani-ino-raa-hia no Iosepha e ta'na ra mau hoa titi. Ua riro ia Ilinoi ei faacaraa na te Feia Mo'a.

I A hurihia Iosepha, e ta'na na tauturu, o Sidine raua o Haeramu, i roto i tefare auri, (o ratou ia te Peresideniraa Matamua no te Ekalesia), parahi noâ ihora te Feia Mo'a i roto i te peapea, tei ia ratou te hoê aratai maitai. O Birikama Youne ia te Peresideni no te pŭpŭ ahuru ma piti Aposetolo, o tei na muri a'e ia i te mana i te Peresideniraa matamua. Ua haaputuputu oia i te mau Aposetolo, e te mau taeae parau-tia, e parau atura oia ia ratou e, e Peropheta mau ia Iosepha, e ani atura oia i te mau taata puai i te faaroo ia amui mai ia'na i te tautururaa'tu i te Feia Mo'a. Ua haponohia'tura te hoê parau i te hui taata faatere no te hau Missouri, i te faaiteraa'tu ia ratou i te mau hamani-ino-raa i te Feia Mo'a, e mai te ani atu ia ratou ia tauturu mai ia ratou ra. I te 19 no Ditema, ferurihia ihora teie nei parau aniraa e taua pŭpŭ taata ra, e e rave rahi noâ te mau taata turatura ia rotopu ia ratou, ua rahi te mau taata iino, e ua vaiiho-noa-hia ia taua parau ra, e aita roa ratou i tauturu mai i te hoê taime. I taua mahana ihora, ua faatoroahia o Ioana Tele raua o Ioane E. Page ei na Aposetolo, i raro a'e i te pue rima no Birikama Youne raua o Hebera C. Kimebela i te oire ra, i Fa Wese.

Ia iteahia e, e ore roa te mau taata tei hamani i te mau ture

no Missouri e tauturu mai i te Feia Mo'a, ite ihora ratou e, ia haapao ratou i te faaueraa a tetavana ra, a Boga e tia'i, e faarue ê atu i taua fenua ra. Tei rotopu ia ratou te mau taata vêvê e rave rahi, no te mea ua êiahia, e ua pupuhia ta ratou mau puaahorofenua, e te mau puaatoro, e ua haruhia to ratou mau fare. Ua mana'o ihora te tahi mau taata paari e, e mea maitai ia haapao to te mau utuafare ia ratou iho; parau atura râ Birikama Youne e, e tauturu atu oia i te feia vêvê. Ua parau atura oia e, e mea maitai ia fafau mai te mau taata tao'a i te tauturu atu i te mau Feia Mo'a parau-tia, o tei hinaaro ia haere ê atu i Missouri. Na roto i to'na itoito e rave rahi te mau taeae tei fafau mai i teie nei faufaa, e haapao a'era te pae rahi no ratou. Ia ite te enemie, ua riro o Birikama Youne ei aratai, haamata ihora ratou ite hamani-ino ia'na, mai ta ratou hamani-ino-raa'tu ia Iosepha, e i te avae Febuare, 1839, ia haere oia i Fa Wese e tia'i. Ua tere atura o Birikama e te tahi atu â mau taeae i tera pae mai no te anavai ra, o Misisipi, e faaea ihora ratou i rotopu i te tahi feia maitai. Ua tiamâ noâ oia, oia iho, haamana'o noa râ oia i te Feia Mo'a, tei mairi i muri iho ia'na, e tamata noa oia i te tauturu atu ia ratou ra.

Ua tae i te tau toetoe, e e mea toetoe mau ia i Missouri. Ua riro ia o Amanada Semita ei hoho'a no te ati e te peapea rahi no te Feia Mo'a i reira. Ua taparahihia ta'na tane, e te hoê tamaiti, e ua puta te hoê tamaiti na'na i Hauna Mila, e rave noa ihora oia i te mau huru ohipa no te taata. Ua parau atura te enemie, e taparahi ratou ia'na, e i ta'na na tamarii atoa hoi, mai te mea eita oia e faarue i taua fenua ra, no reira rave a'era oia i ta'na ra na tamarii e toopae, e i te hoê pereoo e te tahi na bovi, e tere atura oia na roto i te ati e te peapea ia tae noa'tu oia i te oire ra, i Tuinici, ei reira hapono maira oia i ta'na pereoo na te tahi atu mau Feia Mo'a.


O te mahana hopea ia no Novema, 1838, i hurihia'tu ai Iosepha e ta'na ra mau hoa i roto i te fare auri i Libereta, e ua hamani-ino-noa-hia ratou. Aita i faatiahia ia hapono atu ratou e aore râ ia farii i te hoê leta, e e rave rahi te mau

taime i faaamuhia'i ratou i te mea taero. I roto i na mahana e pae, hopoihia maira te tahi inai ê roa na ratou, e ua parauhia ia e te mau tia, "puaatoro Mórromona". Faaara'tura râ Iosepha i te mau taeae ia ore e amu i te reira maa, no te mea ua mana'o ihora oia e, o te i'o iho â ia no te taata. Ia faatiahia ia papai atu oia, haponu atura te Peropheta i te mau leta roa e rave rahi i te Feia Mo'a, mai te faaitoito, e te tamahanahana'tu ia ratou ra. Ua na ô atura oia i roto i te hoê leta: "Te oaoa nei tatou i to tatou hamani-ino-raa-hia, no te mea ua ite tatou e, tei pihaiho ia te Atua ia tatou. O to tatou hoa mau ia oia, e e faaora mai oia i to tatou mau varua. Noa'tu te mau taata tei taparahi mai i to tatou tino, eita e tia ia ratou ia faaino mai i to tatou mau varua. Aita roa tatou i ani atu ia tauturuhia e te mau enemi e te diablo, e aore râ, e ratou hoi o tei haavare, e tamata noa i te faaore to tatou mau ora."

I te pae mua no Febuare, 1839, faatiamâhia ihora o Sidine Ritidone e te haavâraa; mâtâ'u a'era râ oia i te haere i rapae i te fare auri, no te mea parau haamâtâ'u noa maira te enemi i te taparahi i te mau taeae, mai te mea e faatiamâhia ratou. Ua riro râ te tia no te fare auri ei hoa no'na, e i te hoê pô, iriti omoe ihora oia i te opani, e haere ê atura Sidine. I mua'e i to'na haereraa, faaite ihora oia i te hoê mana'o ino, a parau atu ai oia e, ua hau to'na hamani-ino-raa-hia, e to'na mauuiraa i to te Mesia i te ino. No teie nei huru mau mana'o, i haamata'i Sidine i te hi'a i raro. I taua taime ihora ani noa'tura o Hebera C. Kimebera raua o Alasona Ripeli i te mau haavâ no Libeleta ia tauturu mai i te mau taeae, aita roa râ te pae rahi no ratou i faatia ia faatiamâhia ratou.

A haere atu ai te hoê taeae e ta'na utufare i te pae i te hitia o te râ, mai te mana'o e, te haere noa'tura oia i Ilinoi, ua moe ia'na te purumu, e tae a'era oia i te fenua ra i Iowa, i te pae apatoerau. Ua farerei oia i te hoê taote, o Galanada to'na i'oa, e ia faaroo oia i te peapea no te Feia Mo'a, tupu a'era to'na aroha, e parau atura oia e, tei ia'na te tahi fenua rahi roa, e e hoo atu oia i te reira ia ratou, mai te mea e haere mai ratou e faaea i roto i taua tufaa fenua ra. Ia

faaroo Iosepha i taua parau ra, oaoa ihora oia, no te mea, ua iteahia te hoê faaeearaa apî na to te Ekalesia, e ua hoohia te tahi fenua i reira, area râ ua iteahia te hoê vahi maitai i tera pae mai no te anavai ra, no Misisipi, e patu ihora te Feia Mo'a i te oire ra, i Navu, i Ilinoi.—OLE PETESONA.



BIRIKAMA YOUNE.

Te Mau Parau Api.

I TE mau mahana hopea no Tenuare, ua tuuhia i te miti te pahi manuâ rahi i te ao nei. Tei Beritane taua pahi ra, e o to'na faito, e 27,500 tane ia, e e noaa ia'na e 22 mile i to hora hoê.

Ua maitihia a'enei te Peresideni apî no Farani, e ua mau oia i te ohipa no taua toroa ra i teie nei. E taata maramarama e te roo maitai oia, e ua parauhia e, o oia te avota hau i te maitai i Farani taatoa.

E pereoo huru ê roa to te Beritane i teie nei, no te mea te faatere nei ratou i taua pereoo ra i te ie, mai ta te boti te huru. E feau to taua pereoo e te tahi ie atoa hoi. Ua roaa i taua mau pereoo huru ê ra e toru ahuru maile i te hora hoê, ia au maitai te mata'i.

Ua opani-roa-hia te mau feia apî i roto i te hoê haapiiraa rahi i Amerika, eiaha roa ratou e haere i te mau teataraa faaiteraa hoho'a, e ia haere faahou ratou e mataitai i taua mau ohipa ra, e tapuhia to ratou i'oa, e e ore e faarii-faahou-hia i roto i te haapiiraa.

No te mau ohipa ri'ari'a i ravehia i teie nei mau mahana, i te orure hau, i Mexico, ua tonu atu te hau Amerika e 10,000 faehau i te otia o taua fenua ra; e ua ineine roa ratou e tomo i roto i taua fenua ei paruru i te mau taata Amerika o tei parahi i reira.

Na te hoê taata Farani, o Guillaux to'na i'oa, i faatere i to'na pahi reva mai te oire Savigny-sur-Braye e tae roa i Parisa i roto i te hora hoê. Ua au to'na tere i na maile e piti i te minute hoê, no te mea te area i ropu i taua na oire ra, e 118 maile ia. No ite a'enei te tere puai i roto i te pahi reva mai tera te huru.

I te avae ra, i Febuare, ua pai'a mai i roto i te tapuraa i Panama te tahi pae no te mou'a i reira. Ua parauhia e, e pae milioni iati te rahi o taua fenua i topa maira i te avae Febuare, e te topa noa ra te fenua i roto i te tapuraa i teie nei â. No teie nei peapea, ua mana'ohia e, eita paha e oti roa taua ohipa ra i te 15 no Atopa, mai tei mana'ohia i te matamua.

Tei te hoê oire rahi i Amerika, oia hoi, o Boston, te hora (oia hoi te uati) rahi roa'tu i te ao nei. E toru ahuru e ma maha avae ia te faito o to'na mata. E hoê ahuru e ma vau avae te roa no te rima faaite i te mau minute, e e piti hanere e piti ahuru kilo te faito no taua rima rahi. Te rima faaite i te mau hora, e hoê ahuru e ma maha avae ia te roa, e e hoê hanere e hitu ahuru e ma pae kilo to'na faito. Tei nia i taua hora rahi ra e 6,322 mori uira, e no reira e mea maramarama rahi roa i te po, e e mea ohie ia taio i te hora mai te atea roa.

Ua tupu te hoê auahi ino roa i Iapone, e ua pau na tausani fare parahiraa, e e rave rahi te fare pureraa, e te fare haapiiraa. Ua parauhia te moni i pau i taua auahi ra, e roaa e toru milioni dara.

Ua oti a'enei te Peresideni apî no te Hau Amerika i te maitihia, e i te 4 no Mati, ua mau oia i te ohipa faatere no te Hau Amerika. E maha matahiti te maoro no taua toroa ra, ei reira e maiti-faahou-hia te hoê Peresideni apî.

Na roto i te parau niuniu ore, oia hoi, te parau reva, ua paraparau atu na taata i te oire Newport, R. I., te hoê oire e huru fatata i Niu Ioka, e tae roa'tu i Agentine, i Amerika Apatoa. Te area i ropu i taua na vahi e roaa e 8,000 maile. E mea maere rahi roa teie.

Eiaha to tatou mau hoa e peapea i te mea, ua mairi te mau mahana no to tatou vea. Ua reva'tu i te mau fenua Tuamotu to tatou hoa, o Ole, te taata nenei parau, e no te oioi o te pahi i te revaraa'tu, aita i oti roa to tatou vea no Mati; e e mairi atoa rii te vea no Eperera i to'na mau mahana mau.

E hoê ahuru avae a'enei, ua faauehia te hoê taata faehau no te hau Amerika e haere na raro noa, mai Niu Ioka e tae roa'tu i Tarafonia, e ia ho'i mai. Ua na reira oia i te faauehia ia tamatahia te hoê huru tiaa apî na te faehau. Ua oti ia'na i teie nei, e 7,000 maile, e ua pau e maha pea tiaa.

E mea ri'ari'a roa te ohipa no te mau orure hau i te fenua ra i Mexico. I te 23 no Febuare, ua pupuhi pohe te orure hau i te Peresideni no te Hau, o Francisco I Madero, e te Peresideni mono, o Pino Suarez. Ua upootia te mau orure hau i te hoê mau mahana, e ua rave ratou i te Peresideni no te hau e i to'na mono atoa e ua tapea ia raua, e ia vetahi atoa mau feia toroa, i roto te fare hau e pae mahana, e i taua mahana ihora, ia pô roa, ua faaue mai te raatira no te orure hau ia afaihia raua i te fare auri no te hau, e a haere ai raua, e te hoê pŭpŭ faehau atoa ei tiaia raua, na te purumu, ua farereihia mai e te hoê pŭpŭ faehau no te hau, o tei haere mai e faaora ia raua. Ua tupu ihora te hoê tama'i e ua pohe raua e piti. E ao a'era, ua ravehia e iva ahuru e ma pae faehau, o tei imi i te ravea e ora'i te Peresideni, e ua nanaihia ratou i mua i te hoê aua ofai, e ua pupuhi-pohe-hia ana'e ratou e te faehau no te orure hau. E mea ri'ari'a roa te ohipa i ravehia i taua fenua ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.